

海

防

纂

要

海防纂要卷之八

黎陽王在晉明初甫纂 男會必釋荔甫較閱

定武略

兵部尚書胡世寧云自古詰戎練武專備蠻夷盜賊
蓋以二者皆能戕殺生靈傾覆廟社故爲此殺人
以救人非得已也今境外四夷已有 祖訓不許輕伐
先朝惟責邊將謹備其來而或近屯百里之外勢將
入寇則先伐其謀耳自來不曾遠征至于邊境叛軍
卽聽處決擒殺著律已明別無他議若民間盜起則
宜查 累朝設立巡撫兵備 勅詞立爲定制務使

練兵足食一聞盜賊生發即便舉兵撲滅於微一面
奏聞及其既久則宜撫捕兼行以散其脅從離其黨
與而必殲其渠魁不許姑息若其一時失計稍有挫
衄則當體念勝負兵家之常責圖後效以全功其若
終無成功或先隱瞞坐視及有事地方等官或先爭
權曲阻其事或後忌成陰毀其功者皆當重治誤事
甚者卽照先年重例處之

鼓軍氣

都御史唐順之題云戰陣之所以精明與中國之所
勝四夷者氣也而非甲兵之謂也 國家承平日久

文吏游談而養尊武臣恬嬉而寶身閒雅雍容之習
成而慷慨果銳之氣亦寢銷矣南倭北虜倏然內侵
殆若昔人所謂氣炎以取之者賴 皇上天縱 神
武赫然一怒誅逐偷惰拔用英奇文臣督師皆躬自
臨戎有兔罟赳赳之氣自此倭虜不敢深入則氣之
勝也以臣占於行陣之間猶有未盡然者臣視師東
南備觀怯將情狀一聞賊戰如澆冷水顏色可憐縱
不便走股已先慄雖亦未必盡然而然者固多矣至
于倭賊渡洋談笑飲食若履平地而我將棲泊近岨
日遇海風則頭捍目眩夜聞潮則耳聾心惕且夫倭

賊有過藐我將之氣而我將無必吞倭賊之氣則是
未戰而索然也如此而望長驅海島掃清大懟臣猶
以爲難也此氣在宇宙間磨礱而時用之則鮮明置
之不用則黯無精光謂宜文臣督師時御戎服出入
軍中發揚蹈厲以作武將之氣武臣大將遇有賊戰
戎服出入陣中以作偏裨小校之氣偏裨小校遇有
賊戰戎服先登以作士卒之氣而督師武將臨陣督
戰間取潰校逃卒遵奉旗牌事例百萬軍中忽然斬
却一二人以變士卒之耳目使我之氣日益精明則
賊之氣自然銷沮此其言若迂濶而實勝敵之要機

也李光弼蒞軍而旌旗變色每戰必勝氣之謂也

處首級

都御史唐順之云鳥銃手不許割首級亦不暇割首級論賞與餘軍照數分給假如百人爲率或鳥銃手十名餘軍九十名鳥銃手居餘軍十分之一或餘軍內得一首級該銀三十兩則鳥銃手得銀亦十分之一共分銀三兩或鳥銃手五十名餘軍五十名鳥銃手居餘軍二分之一餘軍得一首級則鳥銃手亦得銀二分之一共分銀一十五兩人數搭得多寡分銀數多寡率照此例筭

恤傷殘

巡撫都御史彭 巡按御史孫 等議云優恤軍屬
律有正條隱蔽殺傷例有明禁今後各道并軍衛有
司部下軍兵俱要從實開報陣亡官員給銀三十兩
奏 請陞級他鄉客死者仍給關文陣亡民兵一名
給銀五兩官軍一名給銀三兩被傷軍兵傷重者一
兩傷輕者五錢被殺民人未埋者五錢已埋者三錢
被傷未痊者一錢房燒盡絕十口以上者三兩十口
以下者一兩五錢老小無依者五錢壯丁砍去蘆蒿
者應納鹽課官爲處補俱從兵備道呈請查給若有

隱蔽不報者從重究治督糧道仍將近者議免太倉嘉定上海崇明四州縣荒蕪田糧及民運白糙糧米議改折色數日出榜諭衆通知務裨民有實惠

調客兵

都御史章煥題云今治倭者無他調兵而已臣愚以爲非久計也小發之不足多發則用度不計久駐則老師廢財誓駐則兵散而賊復入且衆兵雜處爭隙易生壯健久曠奸盜自起故客兵協守惟都城塞下可以居之主客相當有所忌也江南民弱客兵所爲庭羸視之者也欲其不亂難矣淫婦女劫貨物殺良

民如是則客兵之亂與倭夷等前世調兵江南皆有明戒

又云調至土兵賊頗畏忌然亦獷悍難馴夫以苗攻倭猶以毒攻毒不可輕用亦不可久用者也是在上醫國手劑量斟酌對病而攻病去即已今既無鼓舞之方復無調停之法事急則懸賞求之勢緩則厭棄置之求之則易驕棄之則生怨此調兵之制未定者也

廣團結

城外團結法間嘗廣詢博訪宜以二十家爲一團除

租房單丁外每一團令養客兵一名每家各設器械
一併出人丁一丁以爲團兵凡二團四十餘家各出
銀一錢造一巷門門上蓋一更鋪鋪內置鼓一面鑼
一面鐵銃三口香盤一方就四十家每夜輪人夫二
名守之居常無事止鳴鼓巡更一有寇警則本處卽
連放三銃四十團兵各執器械追截諸團皆應之其
所養山東兵官嚴立法不許擅離本團騷擾團戶每
日有暇卽教習本處團兵軍門復時時委官查省之
責成之衆旣以勢分而不得爲非團兵之布列者又
以聯絡而相爲友助况一團有賊諸團應之四郊之

外固有隨地皆城隨民皆兵而大城屯守之卒將有不必用者矣

降宣諭

倭夷諸島種類雖繁部落相聯亦有會長衆所尊者號曰天文其法最嚴其威懾衆一人爲盜一家盡滅一島有犯隣島移平卽奉令勘合以時來貢者彼中故事每遇閏年則諸島富倭各出已賞輸於天文請得勘合方來入貢寔則貿遷有無以牟厚利利權在上天文所欲者後因海禁廢弛奸民通番股實之倭徑自貿易不請勘合利權下移天文所不樂者加之

徽賊王徐閩賊林陳輩假稱名號竊錄勘合妄具禮儀私通酋長遂至招呼益衆往來無稽天文所不知者此皆彼中情狀博訪以實故本職在昔具呈題請許令省諭蓋嘗反覆思之審矣若頒降 璽書特遣使命恐偶不敬反生事端若令玩球高麗就近傳宣事在彼中難於取必不如止行浙江巡撫得以便宜省諭當如永樂事例取高僧數人移文乘桴直至天文詳爲傳諭宣累 朝許貢之恩禁近來倭夷之擾發王徐之僞收逃叛之民許修常貢操利權天文雖愚必知所擇蓋日本所需絲綿藥物器用之類悉

皆仰給中國不能缺者若或海禁皆嚴通番盡止彼
日用不足勢必請貢惟命是從而我所欲爲亦無不
遂此又拔本塞源之術也

詰奸細

吳郡生員陳恕云海夷譎詐奸計百出或裝做篋笠
農夫或裝做巾帽婦女或裝做雲遊僧道或裝做乞
丐餓夫探聽消息則如鬼如蜮剽掠村落則蟻聚蜂
屯萬一不謹潛入城郭被其內應噬臍無及爲今之
計必須徧行所屬官司在城則逐戶挨查門禁則仔
細盤詰出軍則尤宜探訪至於掌門之官亦要文武

相兼啓閉以時風夜有警男子則由左女子則由右
不相混淆毋容撓越我兵一出必遣伶俐健卒先行
俾作探聽熟知賊之休息每每寅夜貪淫嗜酒熟睡
休兵眇視我兵不虞我至斯時也果能伏兵四起此
其除奸滅寇之機也爲將官者所宜念之

重隣援

舉人王文祿云今當著爲合救之令若攻一省諸郡
救之若攻一郡諸邑救之若攻一邑隣邑隣所救之
正猶子弟之衛父兄手足之捍頭目保家保身而不
可緩也夫所謂救之者非盡撤居守之兵以救之也

蓋每郡每邑每所抽其精者而救之則合少而成多也惟抽其精者而勵之以敢死之志歆之以信賞之榮或負砲夜偷或繞擊不意則寇腹背受敵驚潰莫支解散而不暇攻矣蓋城旣被圍兵不能出以應敵必得隣境外兵始能救之不然坐待其斃也况東南郡邑有數唇亡齒寒竹破瓦解將安救哉必在位者調元氣倡大義震赫斯怒大爲之處凡有坐視而不救者與失陷同罪則庶乎衆志一而援助之廣可以望其平也

已上俱善海圖編

福建僉事王在晉云年來海波寧謐日間警息相聞

海洋寥邈豈無賊船竊發是在官兵極力巡邏一哨
出洋各哨相爲聲援一船捕賊各船相爲羽翼彼寡
我衆賊當就擒決無捨失之事今日之弊全在把總
偷安惜身重命不躬行倡率孰肯奮勇爭先哨官畫
地分疆苟安坐視聊且塞責便可邀功或見賊不追
追之不力後有追而前不應彼有戰而此不知各捕
出洋前後參差不相爲絡繹聲勢旣孤應援不接如
一人之身手足不交相爲用安能禦敵却侮率由此
道遇警何以收功今照海壇信地被賊捨失鐵頭船
一隻據稱賊船三四隻每隻約有百人此豈一捕盜

所能捍禦者該遊豈無兵衆可堪盡發協攻今不聞
殺一賊獲一械而兵船反爲搶去蓋當時只聞捕盜
奮勇抵敵勢寡膽寒逡巡畏縮力必不支船兵俱各
跳水而船爲賊所據矣哨官雖統衆窮追而至今尚
無下落把總直待墩軍瞭報本遊兵船掛旗出洋方
始知之一身高擁全不加意不知寨遊設兵爲何募
兵設總爲何有官若此地方奚賴焉軍令具在總哨
畏賊不畏法耶除失事員役候查有無追獲另行叅
究一面通行各路及各海防官嚴飭無使賊假兵船
混突寨遊內地用心防範外伏念春汛正殷而人心

偷安誤事仰仗軍令重申振懦作氣如一船失事罪
及一哨一哨失事罪及該總賊船經由地方不能協
力追擊者通行查究獲賊報功從重優賞有托言霧
黑不能窮追任賊縱橫得志者卽以失事坐罪其各
路警急報仍令塘兵飛遞不許經由舖司則警息相
聞而調度爲便矣

別號色

南北中三路各寨兵船旗號原奉約法開載無容別
議外惟南烏船原爲雜商誘賊賊明知而故避於追
擊未便也今施遊擊有不可使人知之說欲假借附

近澳名大書蓬號以愚賊其究使兵船混而賊不我防商船疑而賊不敢犯出奇攻擊此權變之術也但倭已換去烏船儻其倣造或借商艘卒然混至我兵稽察爲難則陽爲無所別而陰自別之先事制人尤爲長便合將三路寨遊出哨南烏船行令各總白爲識認或船頭船尾船身立一暗號使通總之人知之而蓬號則借附近澳名混雜商船中出其不意以擊賊使賊不爲隄備至于各寨遊烏船劄管會哨號帶亦不可少倣照約法五方分爲五色烽火用黑崙臺貳遊如之小埕用黃海壇遊如之南日用藍湄洲遊

則其害更烈不可不深長慮者但其黨同已著聞而
黠賊纔爲敗露彼亦知中土之不能容則或勾連家
屬下海此爲理之所有仍密令海防官及同安知縣
細訪各賊有無父母妻子的親瓜葛防其背地下海
挈衆入倭目前可否發覺從長計議蔣時亨所受之
貨或出讎口妄扳亦未可知并令密訪其事果確另
揭報聞以候裁奪

恤陣亡

通查刊書往牒賞功有條罰罪有等功令昭然可考
鏡焉獨於優恤死亡一節似屬諱言略而弗備夫兩

兵既接寧必無傷百勝之師誰能不敗功成論賞生
則蒙休死難瞑目一草一木尚當軫念况人之生命
乎三月用兵互有勝負仰藉皇天錫佑疆場萬全獲
醜獻俘威靈頗振然鋒鏑橫加瘡痍踵繼七尺化爲
魚鱉一死等於鴻毛海天遼廓嗟哀革之無從異上
沉淪喟自丘之莫遂怒濤激浪苦雨淒風飄渺遊魂
悠然無屬莫非王事盡是生靈本道代署以來急急
於傷亡之軫念已經關行各道嚴查損失船兵將發
汛名冊挨查凡係陣亡者盡數開報以憑類詳去後
今查二十六年事例軍兵陣亡者除每名給恤仍懸

如之浯嶼用白浯銅澎湖遊如之銅山用紅南澳遊
如之號帶可收可放如雜商誘賊除去號帶其寨遊
烏船在外洋相遇各製白旗一面相爲照應旗方四
尺內書某寨某遊二字白地黑字易于瞭望而旗帶
一條則照本船色分別遇夜桅上列燈五盞儻霧色
昏黑難辨連放火炮五箇仍掌號五聲以爲暗號如
晝無旗夜無燈霧黑無炮號者卽爲反船務要稽查
協力攻擊蓋各寨遊以兵船爲正兵而以南鳥船爲
奇兵奇正相生機權互用自爲認識分澳書蓬則各
總之所異製旗點燧放炮掌號則各總之所同事屬

便易可通行遵照仍行各海防把總官嚴禁各澳商
漁船隻值汛期不許遠出大洋混亂瞭望違者獲解
處治

寬勦除

聞得某等通倭且久委爲賊黨蔣賊勾倭入寇據擒
賊黃克強許耀供執甚明內地之生此輩真海邦之
大蠹也卽按法族誅以雪生靈之憤亦不爲過顧賊
之本身向在倭中卒不可致而徒索其家族百千丁
寘之三尺則賊之構怨益深而將來之勾引必廣絕
其鄉土之思甚其報復之念癩潰固不可收而割之

扁其門優免雜差一丁此徃例之可尋者也至於衛
所死敵軍丁紛紛第男告繼府衛或拘擥成例不卽
准補夫軍丁不宜虛伍恤死尤當破格各軍戶下有
精壯親丁者當卽准其補役造糧如係幼丁亦應照
三斗優恤間有戶無親丁幼養兒男親女贅壻舉家
老幼相依爲命而本人願充軍伍者查係精壯似應
亦得推恩又如金門所軍黃某原係子代父名貼駕
子亡而本軍見在應令歸伍食糧各寨遊凡有損失
軍兵者准予事故兵糧內支銀伍兩備設祭禮本把
總躬行致祭以慰幽靈蓋各兵死事不得沾尺寸之

恩而本院奉天明命意指足以動百靈令行自上卽
爲恩典亦報死勵生之一事也

已上俱蘭江集

廣招賞

兵部尚書楊一清云招諭境內軍民舍餘寄任人等
但有膂力過人膽氣出衆騎射之外習學拳棒鎗刀
搥箠鞭簡但有一藝在身一長可取及雖無技能而
乖覺伶俐善窺探事情能出入賊羣不怕生死者俱
各報名在官審實仍令親屬里老隣佑保管無妻子
者量爲安插養贍免其本身差徭擇其尤者立爲總
甲不拘名數編成小隊伍官給器械令其尋襲追賊

殺寇其有頗通書史粗知術數縱橫詭秘機略變幻
之人卽便致之幕下待以殊禮使之察向背觀事變
隨宜委用勿令遺逸在野若仕宦子弟及經過客商
人等情願自備鞍馬出力拏賊報効者皆須留用明
立賞格不拘何項人役但能擒獲斬獲真正賊盜名
顯者隨卽照賞數人併力擒斬亦於賞銀數內別其
首從分給其爲首運謀及獲功數多者照例論功或
陞授世襲軍職填註管軍事或給與散官冠帶榮身
若舉人監生省祭官生員吏典等項能督率家人子
弟親戚人等擒斬賊犯不願從軍功例陞職舉人監

生省祭官起送吏部就行選用生員准令入監吏典免其辦事當該就與冠帶省祭手下之人仍照例陞賞俱至賊情寧息之日停止先年曾犯竊盜拘摸喇唬賭博等項人等願報効者亦各不究既往一體收錄有功照例給賞如此既以成我討賊之功又以塞彼從賊之志而賊知我收納一方之人其勢自孤其氣自沮弄兵頃刻誠不足慮矣仍先告諭此係暫時招集應用賊情寧息之日隨卽遣散務農生理更不拘留以爲常役庶幾人心樂從

先整備

尚書楊一清云一各處地方城池坍塌武備廢弛軍
不識戰鬪官不識教習以爲常事故一日遇賊茫然
無備束手受害其未經殘害之處亦復如是恐尚未
知警策宜急行各該巡撫嚴督盜賊未至地方及時
修理城垣挑濬溝塹整備器械嚴行哨探積糧以待
用練卒以蓄威以無事視有事庶幾倉卒不致失措
矣已上俱疏欽

倡勇敢

蘇軾策云臣聞戰以勇爲主以氣爲決天子無皆勇
之將而將軍無皆敢之士是故致勇有術致勇莫先

法政集卷之十一
十一
乎倡倡莫善乎私此二者兵之微權英雄豪傑之士所以陰用而不言於人而人亦莫之識也臣請得以備言之夫倡者何也氣之先也有人人之勇怯有三軍之勇怯人人而較之則勇怯之相去若廷與楹至於三軍之勇怯則一也出於反覆之間而差於毫釐之際故其權在將與君人固有暴猛獸而不操兵出入於白刃之中而色不變者有見虺蜴而却走聞鐘鼓之聲而戰慄者是勇怯之不齊至於如此然閭閻之小民爭鬪戲笑卒然之間而或至於殺人當其發也其心翻然其色勃然若不可以已者雖天下之勇

夫無以過之及其退而思其身顧其妻子未始不惻然悔也此非必勇者也氣之所乘則奪其性而忘其故故古之善用兵者用其翻然勃然於未悔之間而其不善者沮其翻然勃然之心而開其自悔之意則是不戰而先自敗也故曰致勇有術致勇莫先乎倡均是人也皆食其食皆任其事天下有急而有一人焉奮而爭先而致其死則翻然者衆矣弓矢相及劍楯相交勝負之勢未有所決而三軍之士屬目於一夫之先登則勃然者相繼矣天下之大可以名劫也三軍之衆可以氣使也諺曰一人善射百夫決拾苟

有以發之及其翻然勃然之間而用其鋒是之謂倡
倡莫善乎私天下之人怯者居其一勇者難得也
捐其妻子棄其身以蹈白刃是勇者難能也以難得
之人行難能之事此必有難報之恩者矣天子必有
所私之將將軍必有所私之士視其勇者而陰厚之
人之有異材者雖未有功而其心莫不自異自異而
上不異之則緩急不可以望其爲倡故凡緩急而肯
爲倡者必其上之所異也

經濟類編

議徵集

巡江御史邵惟中上言倭寇薄通州攻圍未解餘衆

自狼山轉掠瀕江諸郡縣而瓜儀爲留都門戶鎮常
乃漕運咽喉不可視爲緩圖宜大集客兵嚴勅諸臣
協心戮力共靖其亂下兵部覆題倭自入犯以來未
有徧浙之東西江之南北如今日者縱使地方多兵
而分授防禦不無顧此失彼之思徵兵應援實不吞
已日者御史趙孔昭乞援已議令徵集湖廣土舍永
順夷兵併山東河南廣東打手毛胡盧等兵共六枝
俱赴浙直軍門聽用今再議選河南睢陳及山東八
衛兵陝西延綏兵徐沛募兵勅遣才望大臣一人總
督前去以爲倚角保障留都 上然之 肅皇大讚

行保甲

工部尚書馬坤等題欲將土著之人各就一鄉編入保甲盡歸團練五人爲伍十人爲甲五十人爲保上下聯絡委各府州縣佐貳官賢能者不時就其一鄉團兵閱其武藝又因而稽其人丁如有潛入賊中勾引或探聽者坐罪若有隱弊互相連坐

詩海圖編

先年倭患皆起私通各處鑛徒多由窩引若內無勾引則外難闖入今欲絕盜萌莫先詰盜詰盜之法無過保甲府州縣正官查照原行保甲之法不問山鄉海陬城村市鎮去處官吏生徒舉監之家務逐戶挨

查每十家編爲一甲立一甲長十甲編爲一保立一保長甲長管十家保長管百家數不及者就近隨數附編每家各辦本等器械置一小牌將本家丁口盡數開報如已房或賃房并保甲長與上甲之尾下甲之首姓名一一填註懸掛門首保甲長與各甲民人時常譏察如今日某家多一丁卽究其來歷以防窩藏某家少一丁卽查其向往以防竊劫若有遠出不歸或假名走廣下海私通窩引流徒盜鑛覬利者許甲內人首官拏治申請給賞容隱不舉十家連坐若能自首或親屬首者俱准免罪

辨真僞

真倭僞夷往多混報真倭頂心願門皆禿類匏立而孟跪而控拜而伏皮肉緊縮僞夷雖禿而髮隱類僧坐而食利必匿險必避若不辨明非惟功賞不實亦多戕害人命徃領官兵有將被擄逃回或漁商平人及避難鄉民假稱奸細妄殺報功深可痛恨除通行嚴禁外今後海上報捷聽該道詳加勘驗如果頂心願門無髮及皮肉緊縮者方爲真倭首級轉送紀驗其詐冒無據者卽究明坐以故殺抵償至於指稱奸細妄殺報功者尤易見蓋奸細必潛形夜伏或

假扮鄉民混入懼詰數不能多既已覺露可縛而至
非臨陣血戰者比何用斬首以後奸細止許生擒不
許殺害違者一體抵罪

已上俱都御史溫純練兵檄

撫歸降

漕運都御史鄭曉奏倭寇類多中國人其間有勇力
智謀者可用每苦資身無策遂甘心從賊爲之嚮導
若不蚤圖區處必爲腹心憂乞命各巡撫官於軍民
白衣中每歲查舉勇力智謀者十數人與以義勇名
色月給食米一石令其無事則率人捕盜有事則領
兵殺賊立有功勞量議官職奏請陞授如此則悍卒

漸受條籠不惟中國之人不爲賊用異日且有將材
出于其間今從賊者宜出榜諭許令歸降遣還故土
有擒斬賊徒者如例給賞才力可用者立功贖罪俟
有勞績亦與敘遷不然數年後或有如盧循孫恩黃
巢王仙芝者益至滋蔓難撲滅矣

兩朝憲章錄

慎征討

皇明祖訓云四方諸夷皆限山隔海僻在一隅得其
地不足以供給得其民不足以使令若其自不揣量
來撓我邊則彼爲不祥彼既不爲中國患而我興兵
輕伐亦不祥也吾恐後世子孫倚中國富強貪一時

戰功無故興兵致傷人命切記不可但胡戎與西北邊境互相密邇累世戰爭必選將練兵時謹備之

嚴哨探

副使劉 曰軍機重務偵探爲先海洋遼遠傳報責的况狡寇乘潮往來我兵截勦策應全在烽燧不愆警報及時及訪得各路官兵率多玩寇喜功虛聲邀賞或駕空勦說搖兀衆心或捉風捕影妄傳警報或縱賊已過而云窮追不及或臨敵退縮而云風阻不前或忌隣境成功不行策應或攘他區功次先報捷音一警衆咻各報互異至有殺漁樵以報虛功縱直

寇而不以聞者邇來本道總叅戒諭雖嚴而舊套未
改故違法紀干犯軍機相應嚴加申飭合行各該將
領等官務要親督兵船遠出外洋往來哨探遇有賊
船經由信地卽許從實飛報某處賊船幾隻大約賊
有幾何傳報隣境分投防禦火速應援一面急督官
兵相機夾勦務要殄除盡絕以靖地方止許先報本
道及總叅衙門覈實轉報其把總哨官不得虛張越
報若賊未近境尤不許望風先報亂人耳目致人疑
信至於遠哨兵船見賊卽當馳報又不可限定信地
致悞機宜若賊由信地及在海洋搶擄漁船相應飛

報而隱匿不報者查叅重究處以軍法庶事體歸一
邊報足憑緩急勦守之間自有曲中之策矣

海防類考

設城舖

大明令凡各處城樓窩舖腹裏有軍城池每二十丈
置一舖邊境城池每十丈置一舖其總兵官隨機應
變增置者不在此限無軍處所有司自行設置常加
點視毋致踈漏損壞提調官任滿得代相沿交割違
者治罪

謹更寐

兵出不意乘夜偷營者詭敵之常往往倭之入犯而

海防集要 卷之八 二十一
船兵失於防範者皆由乘夜掩我不備一船失事萬
衆風奔以故夜防猶宜加謹脫使假寐偷安關係匪
細以後遇夜各船捕盜先定輪值更次各兵姓名粘
貼艙口聽放靜砲後祇更各兵必高立船面頭尾目
必外視遠洋心無內顧他物手則下下着實敲梆儻
有船隻或木植竹筏草木束物黑片浮來卽高叫何
船細聽鄉音辨察何物如無詐僞卽令離艚遠泊以
杜奸宄如能認緝實跡拏獲奸細者從重加賞如或
賊近而不知查 而不覺致悞機事者卽以軍法處
治

密搜邏

倭船深入其心必恐隱伏深避其情必然且逢山取水又勢之所必至者或乘昏夜藏匿山灣或因晨發乘我不備若不嚴加搜邏彼伏我息不但失賊處所抑且可乘我不意其患最大此搜山之法最爲要着如申酉之交及辰卯之際各船務要整棚兵器時如對敵在處山嶽凡可泊船之處嚴加搜邏以戒不虞敢有虛應故事致悞軍機者悉以軍法重處

期共濟

將識兵情兵識將意謂之上一心惟上一心則

必成功上下乖離必致債事况舟師又與陸兵不同
一舟之人如同一家捕舵什兵又如家之父兄子弟
父兄子弟和氣孝友則家道必成外侮可禦若父兄
子弟自相戕賊不特家道無成人將侮之矣况捕舵
什兵同舟共濟平時若有不和未有臨事而能得死
力者官兵遠出外洋其間不無風寒暑濕疾病之虞
小恙則可本船調治重疾在船更多不便既不許擅
離又不得醫治是見死而不救非死生相依之道今
後如有船兵染患病重者許扶至附近本港宮廟暫
住令該營醫生調治痊日就于本兵月餼內酌量扣

償藥餌之費其有物故者卽令該船爲之殮埋汎畢
該總哨詢其有家者使其扶柩歸葬故山無家者該
管呈報本司少示恤典各該總哨捕者平時務要士
卒甘苦相共一遇有警亦必親冒矢石分糧裹餓以
盡爲將爲頭目之分毋得自分泰越卽隣境有急更
須星馳應援彼此夾攻唇齒相衛毋得觀望悞事且
官捕視什兵如手足則什長亦視官捕如頭目上之
視下如子爺而下之視上加父兄平時疾病相扶甘
苦相共而至臨敵危難之際什兵有不致身用命者
我得按法而治之彼復何憾所謂將識兵情士識將

意此也已後敢有故違前訓在上不恤士卒在下玩愒偷安不奉約束者輕則徑行責治重則解來治以軍法

嚴伏路

東南夷之最狡獪者莫如倭使官兵備禦少疎未有不墮其術中者大寇則百十成鯨防禦或易小盜則踪跡詭秘偵探恒難蓋彼一入我境必棄其原船劫我漁舟變形易服掠我商人白衣搖櫓漫難識辨致被戕害往往官兵不覺地方失事多由於此若不嚴加伏路認識旗號則狡獪之奸豈易防也况防倭于

書易防倭于夜難防大鯨之賊易防零星之小寇難
故伏路之船不可不慎也今後各該信地每夜于衝
要港口輪撥唬船二隻設伏凡遇一應往來船隻卽
便盤詰其情形可疑者不特驗其船面之網罟尤須
詰其艙內之漁人第恐倭奴脅令被擄唐人在上執
繚掌舵而賊隱伏艙下愚我耳目使不爲防頃刻之
間流突大鯨悞事匪細必須嚴諭伏路捕舵督率各
兵環甲荷戈卽如對敵不許一人偷惰時常盤詰往
來船隻的確無弊須令遠泊港外次早放行毋容近
鯨偵事若遇真正賊船卽舉火張燈連放起火三枝

爲號以便接應追勦因而收功伏路捕兵卽與衝鋒者同賞如有踈虞致賊漏遁失悞事機伏路捕兵與臨陣退縮者同律

已上俱備倭紀略

審寇術

倭夷慣爲蝴蝶陣臨陣以揮扇爲號一人揮扇衆皆舞刀而起向空揮霍我兵倉皇仰首則從下砍來又爲長蛇陣前耀百脚旗以次魚貫而行最強爲鋒最強爲殿中皆勇怯相參賊每日鷄鳴起蟠地會食食畢夷酋據高坐衆皆聽令挾冊展視今日劫某處某爲長某爲隊隊不過三十人每隊相去一二里吹海

螺爲號相聞卽合救援亦有二三人一隊者舞刀橫
行薄暮卽返各獻其所劫財物毋敢匿夷酋較其多
寡而羸縮之每擄婦女夜必酒色酣睡劫掠將終縱
之以焚烟焰燭天人方畏其酷裂而賊則抽去矣愚
給我民勿使邀擊專用此術賊至民間遇酒饌先令
我民嘗之然後飲食恐設毒也行衢陌間不入委巷
設恐伏也不沿城而行恐城上拋磚石也其行必單
列而長緩步而整故占數十里莫能近馳數十日不
爲勞布陣必四分五裂故能圍對營必先遣一二人
跳躍而蹲伏故能空竭吾之矢石火砲衝陣必伺人

先動動而後突入故乘勝長驅戰酣必四面伏起突
遶陣後故令我軍驚潰每用怪術若結羊驅婦之類
當先以駭觀故吾目眩而彼械乘憤雙刀上誑而下
反掠故難格鈹鎗不露竿突忽而擲故不測弓長矢
巨近人則發之故射命中斂跡者其進取也張揚者
其逃遁也故常橫破舟以示遁而突出金山之圍造
竹梯以示攻而旋有勝山之去將野逸則逼城欲陸
是則取解或爲穿以詐坑或結稻桿以絆奔或種竹
簽以刺逸常以玉帛金銀婦女爲餌故能誘引吾軍
之進陷而樂爲吾軍之邀追俘虜必開塘而結舌莫

辨其非倭故歸路絕恩施附巢之居民故虛實洞知
賞豐降擄之工匠故器械易具細作用吾人故盤詰
難向導用吾人故退熟宿食必破壁而處乘高而瞭
故襲取無機間常一被重圍矣餌以偽敵而逸之或
披蓑頂笠沮溺於田畝或雲巾紵履蕩遊於都市故
使我軍士或愚而投賊或疑而殺良江海之戰本非
其所長亦能聯虛舟張弱簾以空發吾之先鋒捐婦
女遺金帛以弭退吾之後逐凡舟之裙牆左右悉裹
布帛被褥而濕之以拒焚擊交闕間或附蓬而飛越
卽雷震而風靡矣寇擄我民引路取水早暮出入按

籍呼名每處爲簿一扇登寫姓名分班點關真倭甚少不過數十人爲前鋒寇還島皆云做客回矣此被我兵擒殺者隱而不宣其鄰不知猶然稱賀

倭奴之勝我兵專以術也卽以其術還治其人不必用古法蔑不勝矣

辦船器

日本造船與中國異必用大木取方相思合縫不使鐵釘惟聯鐵片不使麻筋桐油惟以草塞罅漏而已名短水草費功甚多費材甚大非大力量未易造也凡寇中國者皆其島貧人向來所傳倭國造船千百隻皆虛誑耳其大者容三百人中者一二百人小者四五

十人或七八十人其形卑隘遇巨艦難於仰攻苦於
犁沉故廣福船皆其所畏而廣船旁陡如垣尤其所
畏者也其底平不能破浪其布帆懸於桅之正中不
似中國之偏桅帆常活不似中國之定惟使順風若
遇無風逆風皆到桅盪櫓不能轉舵故倭船過洋非
月餘不可今若易然者乃福海沿海奸民買舟於外
海貼造重底渡之而來其船底尖能破浪不畏橫風
鬪風行使便易數日卽至也

凡倭船之來每人帶水四百斤約八百碗每日用水
六碗極其愛惜常防匱乏也水味不同海水鹹不可

食食令人泄故彼國開洋必與五島取水將近中國
過下八山陳錢之類必停船換水所以欲換者冬寒
稍可耐久若五六月蓄之桶中二三日卽壞雖甚清
冽不能過數日也海洋浩渺風濤叵測程不可計遇
山而汲亦其勢耳盥頰沐浴海水山水亦可用或云
浴海水令人膚裂近訪之不然但黑肌膚而已倭奴
有一秘法煮泉一二沸置之缸缶能令宿而不壞然
亦不過半月久用不能也其至普陀必登者非換水
亦非真欲焚香乃覘兵防虛實耳

倭刀大小長短不同立名亦異每入有一長刀謂之

佩刀其刀上又插一小刀以便雜用又一刺刀長尺者謂之解手刀長尺餘者謂之急拔亦刺刀之類此三者乃隨身必用者也其大而長柄者乃擺導所用可以殺人謂之先導其以皮條綴刀鞘佩之於肩或執之於手乃隨後所用謂之大制又有小裁紙設機刀出長門號兼常者最嘉又有作贄禮賀禮不拘大小名雖爲刀其實無用

刀有高下技有工拙倭之富者不恡重價而制之廣延高師而學之其貧者所操不過下等刀耳善運刀者在於前衝鋒可畏頗有限也中國人望之輒

畏而避焉擒獲夷刀亦莫辨高下混給兵士故志
之已上俱登壇必究

禁通番

愚惟夷狄之慕中國猶中國之慕十洲三島而其慕
中國之子女王帛也猶中國之慕瓊林大盈之積也
惟其無路可通無人可引是以終其身不到焉不取
焉有如招之使來導之使前而禍且立致矣先年海
禁少弛遂有王直葉宗滿等之廣東造巨艦將違禁
物抵日本往來互市致富不貲遂招納亡命徐海陳
東等勾倭劫掠流毒乃滋甚此往事之足鑒者邇如

辛丑年閩廣中倭于時本職代攝巡海所擒馘之倭
爲閩人某之部落皆中國之亡命也故閩人勾倭如
鼓之應桴影之逐形呼吸相通靡不還至而立驗者
今不意閩人舍海澄月港之故道而乃假道于浙爲
入倭之門戶也由浙入倭便于置貨又便于乘風舍
彼就此最爲直捷夫蛟川爲倭入貢之路倭每飯不
能忘年來因禁絕勾引不知路境是以逡巡不敢犯
此罅一開則倭之爲患不遠矣計通倭之船未有不
由港門而出則未有不通同守把官兵而得揚舩下
海者通倭之船未有不由本地打造則未有不托勢

海防集要 卷之八 二十一
豪而敢糾伴結夥者通倭之船未有不假各衙門印
信牌票批單則未有不先請乞爲獲身執照者近有
持書乞船批往溫州販載被本道呵叱其僕而歸原
呈具在此非下海之執照乎夫艚艚烏尾船隻明爲
下海入洋之具喚工打造非旬日之可成停泊河港
招搖耳目而地方不之詰官司不之禁偷度關津守
者不之覺帆檣出海總哨不之追蓋用厚利爲結納
而藉強力爲遮護其故難言之矣趨利附勢而不以
法繩之則官不能與勢利爭按法繩下而不以死惕
之則法亦不能與勢利爭通番之律甚輕其獲利也

十倍而其觸禁也罪止於杖有重利以作之趨無重刑以使之懼法輕易犯非重加遣戍沿海之奸何繇知戢乎造船必有船匠造違禁之船者罪坐匠工僱船必有船戶載違禁之貨者罪坐船主寫船必有船埠攬違禁之商者罪坐埠頭則牙匠皆知所惕矣奸商造船里甲排隣不首者罪及地方經過關津私自放行者罪及關吏出由河港受賄縱脫者罪及守把則官民皆知所惕矣販賣異樣段疋及氈毯絲綿等物舖戶知情不覺發者罪及各行歇家牙僧知情不檢舉者罪及牙歇則商舖皆知所惕矣夫閩商入浙

浙貨入閩此商途貿易之常勢不能遏然入閩自有
大關小關正路含嚴衢而由寧紹台溫其爲海販明
矣近議欲于西興關官爲驗票恐地棍藉名需索不
如責令杭城沿江一帶船埠凡閩商載貨路由嚴衢
者方許運發若渡江而東必報官稽覈北新關稅票
當風汛之月閩商販段百疋絲綿數百斤及有鴉條
布疋等件有似通番貨物者卽着本關委官報府查
其去嚮若委官不報船埠不首而或從定海等關盤
出委官劣處埠頭船戶問罪其照常時月不必稽查
此亦法之可行者也至于奸商假託勢豪驀地通販

人情重于發難須着府縣正官總捕海防官及叅遊等官細偵密訪果有隱奸卽密揭報院拏究恐耳目難周廉訪不及更責成于刑廳多方體察得情不時飛報凡遇撫院出汛及按鹽二院巡行同地方訪犯一并開遞如本處有通販之奸而地方官不及覺啓至于敗露則親臨官長俱有不得辭其責者儻商船至彼縱放出洋罪在叅遊總哨一體議處著爲功令則有官守者不得漫常視之矣再照閩船不入浙浙船不入閩俱限溫福分界沙埕地方換船此向來通行之禁也五月六月正發船通番之候有違禁越

海防集要 卷之二
界之船卽將其船入官凡係閩中載木貨大船盡行
收入定海不許出洋閩船不入浙船不出茫茫大滙
豈一蒞之可杭而華夷之路絕矣其沿海縣分行令
正官編令保甲溫台寧紹杭嘉六府沿江近海船埠
船匠俱籍名報官如有打造異船及裝載奸商貨物
者一一根究沙民及漁民業海者各船頭目開報姓
名填寫官旗船票明開某處採捕限日回銷止許駕
使艚網黃家塘白舫香挑漁喇小船于近海生理不
得遠出大洋搭廠久居絕島若南漁山釣船轆集經
冬久泊悉從嚴革凡各衙門船批牌票及郵符等項

不許輕徇請求混給一應入海船隻擅用鄉官牌額
旗號并以旗號燈籠佔塗繫箭者盡行逆斥官兵得
賄賣放以軍法網打坐贓科罪問革其通倭應得之
罪伏候專題改從重律則海上亡命有不潛消異
志者哉至于通番各犯流入倭中睥睨觀望寬之或
可望其歸來急之當益堅其遠竄閩之逋賊終不驟
躡泉屬者以其父兄宗族在也往歲有抄沒之議有
言其不可者止之今亦數年不爲閩患以王直之跳
梁而終納款軍前執之以付法吏蓋亦厚念其母妻
子弟不恤延頸受誅今各犯親丁家屬須嚴加防範

毋使縱逸明年春汛更虞勾倭襲取城守之具倍宜加謹彼果悔禍來歸則當待以不死開自新之路消勾引之萌法令申嚴期于必行必信則海氛自息而東南半壁可保百年無事矣

浙與倭隣剝床可慮林清以十月初五日開洋十二日直達彼當冬汛尚爾飄搖矧春汛乘風更虞迅速往時閩船不入浙界故臨汛易于稽防今雖三令五申而透漏如故定海關外船隻混淆商販莫辨此可不嚴界限乎香船例不稅驗而奸販托名進香儘多私載以普陀爲寄寓此可不嚴稽覈乎督稅有官而

任關霸之把持憑埠頭之買放汪主簿之查驗毫無
兵貨捕役之追回豈是原船此可不嚴究詰乎杭城
之貨專待閩商市井之牙勾同奸賈捏名報稅私漏
出洋此可不嚴入官之禁乎擅造通番大船地方不
報官司不聞差役通同里甲隱蔽此可不嚴連坐之
法乎內地造船必由港門而出各港俱爲官兵汛地
扼其險阻豈能飛越此可不嚴守把之令乎普陀一
帶爲入倭要路商船入倭多由官兵賣放謹其防閑
勤于哨探此可不擇總哨之官乎夫倭大有欲于
中國然猶睥睨而不卽發者非真畏 中國之兵也

森茫天塹苦于無船今奸商各船而往併船而歸倭固有其船矣前驅嚮導苦于無人今奸商覓利則來而復往虧本則往而不歸倭固有其人矣火藥箭銃苦于無具今絲綿綉絹可帶則硝磺銅鐵亦可帶倭固有其器矣彼方利我之玉帛而吾以玉帛導之彼方窺我之虛實而我以虛實告之鼓之舞之者奸商也奸商衆則海賊繁入倭爲商遇商爲賊在海爲賊入內地爲倭海賊繁而倭必至亂必作其究則由奸商通販始嘉靖間海禁少弛而宋素卿王直徐海等勾倭作難蹂躪我內地虜我人民還至而立有效

今一歲而獲通倭者三聞閩中各路有三四十船下
海網巾雲履等物靡所不售髡奴效法唐人鱗鱗易
我衣裳時事儘堪蒿目興言太息幾于談虎而色變
矣今欲嚴通番之禁必明揭條例昭告于人庶借本
之大戶盡知愛惜其貲財影射之奸豪咸思保全其
氏族涉海之僂民併圖顧恤其身軀防守之兵戎亦
思謹嚴其節制其間用法雖浮于律而原情實符于
例蓋戢禍止亂必期法重而民畏借數十人以行法
而海濱無盡之生靈所活不知幾千萬億也此今日
防海之亟圖所當請 命于 朝者若夫善後弘遠

之猷則有院臺之主裁摩畫在矣已上俱越

閩與倭隣聲聞悉達沿海無賴往往勾倭行劫甘心嚮導其家屬宗黨明知故隱而陰厚藉以爲利地方家甲懼害通容甚則接濟以爲奸一人造孽毒流中土濱海騷然今歲其尤甚焉則以連坐之法不行故勾引之奸益肆僂民無憚奚事不爲查得大明律例一款凡沿海去處潛通海賊同謀結聚及爲嚮導劫掠良民者正犯比照謀叛已行律處斬仍梟首示衆全家發邊衛充軍又查全閩約法開載一家通倭接濟潛爲不軌澳甲總甲甲長同家甲人等具實報官

將本犯處以極刑財產藉沒全給充賞敢有容隱被
他人首發及官兵緝拏者家甲連坐渙甲總甲甲長
另行重處縣官奉行不力亦卽查叅任俸事干勢豪
阻撓一體叅究遵行已久但用法者因循姑息養奸
貽患長此安窮合無申明律法嚴行禁約一人通倭
一家竝坐一家通倭家甲竝坐凡地方容隱及勢豪
阻撓者一體究罪及查今歲海寇猖獗沿海漁民輒
爲擒獲應敵軍兵或有陷賊不死者一入倭中便爲
役使事出無已情屬可矜儻能乘間逃歸卽爲良民
縱使從賊數載一旦改圖奔還中土仍許自新被虜

軍兵其家雖已議恤但能歸國優恤之銀免追失事之罪勿論如遇泛海歸來哨邏官兵遞送所在官司審明發回本鄉以安生業有能偵探倭情的實來報者給賞敢有從倭侵犯被官軍擒獲或係賊黨供稱有據家屬竝罪其有賊首勾連海寇爲其嚮導殺掠良民者全家比謀叛論盡法處治則內賊聞風知戢不至蔓延流毒矣

蘭江集

番人潛任內地窺我虛實漸誠不可長也然番豈能自來不有內主而外勾之人乎甚者仕宦富豪之家假貸無藉始而以重利餌之旣而以虛辭糜之餌之

則來而日多靡之則怨而生變是交通之爲也而交通之禁不可不嚴矣漳泉之間小醜構釁如吳雙引葉日新之流漸尤不可長也然彼豈獨非人得無有積習而輕視之心乎自倭變以來漳人多爲盜魁而漏網黠者因之以惑人愚者憑之而妄念以爲舉事未必其大害而入海或足以偷生則姑息之過也而姑息之政不可以復施矣人情大端不出利害有所以利之而無所以害之則何事而不可爲故兩釁者異流而同出一源者也今惟以其所害而奪其所利彼知有利焉而不能勝其害也則孰與爲不善哉

王

福建巡撫丁繼嗣題稱欲絕勾引必清海販欲清海
販必先自勢豪之家有犯必處之重典議請申飭連
坐之法一曰責成澳甲沿海縣分挨次編爲保甲凡
船埠船匠籍名在官如有異船異貨拏獲一家有罪
十家連坐二曰責成縣官凡造某樣船隻往何處挾
買某樣貨往何處賣縣官若能詢訪誰不吐露如能
擒獲販船者獎賞課薦如有該縣販船別處擒獲者
以不職連坐年終照次數降斥二曰責成官兵沿海
寨遊拏獲船貨千兩以外照律賞三分之一百兩

以外盡數充賞遇缺超補叅遊以下敘錄有差如或
受賄賣放各寨拏獲汛守兵究革叅罰四曰責成各
道沿海延袤二千餘里互相推諉策應何及今漳州
責守道泉州責巡道興化屬福寧守道福州屬兵道
福寧州屬福寧巡道春冬二汛親巡海上選將練兵
造船製器一切防禦不許推諉若各道緝獲販徒該
道初次紀過再則聽叅自能覺發擒獲多次者特舉
超擢沒官贖物除充賞外聽部議處濟邊萬曆四十年題准
兵部覆議凡泛大洋而出者奸人也所畏不在戍今
天下擬戍者一到戍所未有不縱而歸旣戍而歸猶

之乎民耳而復踵所欲爲亂之生也何日之有應行各衛掌印管軍員役凡有軍犯到衛務要照例取具的保收伍該道不時稽查如有用賄斃法縱令避回者該管員役及窩藏之家俱照賣放窩藏律問擬其本犯仍照例從重擬罪庶法紀明而奸頑知畏矣

曆四十年題准

萬